

## Sicole

### L' adjectif

Èn adjectif, c' est on mot ki cwålifeye [*qualifie*] on sustantif (kimon no [*nom commun*]).

on tchvå => on **blanc** tchvå ; on **foirt** tchivå ; on tchvå **ârdinwès** ; nosse tchivå est **bea** ; ces tchvås la sont **malâdes**.

#### Sôres d' adjectifs

\* adjectifs djondreces [*épithète*] :

i sont metous tot esconte do no: ene fråze **âjheye** ; en **mâlâjheye** luçon ; on **bea novea tchôd** paltot ; on **saké** tchapea ; des **arnâjhes** djonnes ; des **stroetès** voyes.

\* adjectifs sudjetreces [*attribut du sujet*] :

i sont metous après l' viebe « esse » u on parey a lu : mi **cote** est tote **niche** ; **dji dvén vî** ; **ces efants la** n' savèt **dmorer rastas** cénk munutes.

#### Acoird di l' adjectif

I s' acoirdêye e djinre ey e nombe avou l' sustantif k' i cwålifeye.

on **bea** ome ; ene **bele** comere ; des **beas** omes ; des **belès** comeres.  
on coraedj**eous** valet ; ene coraedj**euse** bâshele ; des coraedj**eous** valets ;  
des coraedj**eusès** bâsheles.

il est hod**é** ; elle est hod**êye** ; i sont hod**és** ; ele sont hod**êyes**.

on spectåke estrordinaire**e** ; ene pîce estrordinaire**e** ; des djins estrordinaire**es**.

#### Les adjectifs absitroets [*abstraits*]

I gn è-n a bråmint moens k' e francès, dit-st i Louwis Rimåke. Paski pocwè ?

\* On dit l' minme cayet avou ene ôte emantchaedje di fråze

fr. *c'était très festif* => wa : on s' î a **amuzé come al dicåce**.

\* on prind ene adjectivire [*locution adjectivale*]

fr. *je voudrais un demi-kilo supplémentaire* => wa. dji vôleu bén on dmey kilo **d' rawete**.

#### Noûmots ki c'est des adjectifs

Sayans d' è fé pol bate des noûmots 2019 : *le défilé était bien, mais les robes étaient vendues à des prix inabordables ; votre enfant a eu un comportement inacceptable ; malgré tout, c'est une opinion minoritaire ; il est climato-sceptique ; je t'invite à une réunion festive.*

## **Eciclopedeye :**

### **Les olyinnes**

C' est des demonêyès tourniketes (ou « moléns à vint »), 50 metes hôtes, avou ene grosse buze pikêye dins tere (li mastea), ey ene cadje àl copete (lomêye « naçale »), ki prodût dl electrike.

Ele sont metowes ene dilé l' ôte (250 a 700 metes) dins çou k' on lome on « zônigne d' olyinnes » [*parc éolien*], u po s' fote, « tourniketreye ».

On lzès plante so les cresses (Årdene, montinnes pattavå l' Daegne),

#### Istwere

Dispu les anêyes 2000, end a todi dpus dins tos les payis. Pask' on a stî brâmint rafroedis do produjhaedje di corant avou l' atomike après l' accidint di Tchernobil (1992) et co dpus après l' ci d' Foucouchima (2015?).

Li prumî zônigne d' olyinne el Basse Årdene, ça a stî a Tiyet (2002-2003). Li ci d' Bive a s



Tiyet 2005



Almagne 2012



Bive, 2011

#### Advintaedjes

\* Ele durèt 20 a 30 ans, et produse do corant avou l' air, çou ki n' costêye rén, on côp k' elle sont montêyes. Nén come les cintråles à tcherbon u à gâz.

\* On côp fotowes, on les dismonte, et c' est àjhey di ralouwer les bokets (fiermint, câbes, dinamo). Nén come les cintråles atomikes.

\* Les djins ki metèt leus tchamps a louwer ont on foirt bon rivnou (8000 € par an po èn åre). On pout co tcherwer u mete des biesses tot åtoû.

#### Dizadvintaedjes

\* Endè fât mete tocosté po produse li minme cwantité d' corant k' ene seule cintråle. Des djins k' i gn a trovèt k' ça fwait må parexhe li payizaedje ; des ôtes trovèt k' c' est bea, come d' aller vey tourner on molén à vint.

\* Ça fwait ene miète di brut, et cwand l' solea est so l' ombrant, li tournaedje des pales fwait come dins ene sâle di danse (stroboscope).

## **Belès-letes**

### **Richard V. De Smet**

C' esteut èn ome di Rdû, k' a fwait ses scoles après Tchålerwè. Pu aler missionaire djezwite ås Indes (a l' Institut sint Zavî, a Mahin, on viyaedje dilé Bombai). Il a-st evoyî on powinme scrît e 1948, ki Willy Bal a rtruvé, et evoyî a Lucyin Léonard, ki l' a fwait parexhe dins « Les Cahiers Walons », l° 3, 1970, p. 49.

Il î rapele les ôtes missionaires walons (tertos des djezwites) k' ont stî evoyîs dins les Indes, et k' ont scrîts u studyî l' walon :

\* Adlin Grignard : il esteut d' Vervî, min il a fwait ses scoles do costé d' Tchårlerwè, et studyî l' walon di 20 a 30 viyaedjes do Pays-Noer.

\* Jean Levoux, di Vervî ossu, k' a ddja ratourné e 1896 « Li vicåreye da Simon et Linåd », on live d' imådjes e-n almand.

### **Prezince di m' moman (a si ordinåcion)**

Il a metou ses mwins so m' tiesse,  
Ey ene sacwè k' dji n' sâreu dire  
A-st advinou dins mi. Si djesse  
M' a candjî po todi. Ayir  
Dji n' esteu k' on bribeu sins droet ;  
Asteure, dji vos va dner l' Bon Diè

.....

Dispu ki m' moman est evoye  
Et m' a leyî mierseu sol tere,  
Les moes, les ans, les doûs, les djoyes,  
Dj' els a viké come ene istwere  
Ki m' diveut moenner a ç' djoû ci  
Dins ene tchapele, bén lon di m' payis.

Dj' a leyî m' pa, mes sours, mes frés ; (*frères*)  
Nolu po-z ôre mi prumire messe,  
Po-z esse beni po missionaire. (*missioné*)  
Portant, totes mes djins sont-st al fiesse,  
Li todi djonne sorire di m' man  
Riglatit dins l' cour di s'-n efant.

## **Tchanson**

### **Li racoulot**

#### **I.**

Dji so l' pus ptit ; dji n' sieve a rén  
Dji so sovint cåzu l' pus biesse  
Dji so trop djonne, et djel sai bén  
Po djouwer del muzike al fiesse  
Dj' so èn arsouye å nez croté  
Dji vôleu rire, dji vôleu scrire  
Dji so trop flåwe, et djel sai bén (bé)  
Po flayê l' bale et boere li bire.

#### **II.**

Pôle pitite cawe, dj' so l' racoulot  
Dji cache a fé çk' est nén åjhey  
Come tos les ôtes ; mins, e m' coulot,  
Ça toûne todi pa des braireyes.  
Dji so l' pus ptit di tote el binde  
Et si vs riyoz do ptit marlou,  
C' est k' po l' moumint, i doet ratinde.  
Mins si i crexhe, waitîz a vos (vous) !



Cåzaedje :  
Gérard  
Baudrez ;

Muzike et  
tchantaedje :  
Vincent Delire

Plake : li 4  
(2018)